

Grànda varietad da flurs ad earvas

Agl rom digl campiunadi da pros da flurs ân igls experts dumbro las spezias

DA BARBARA RIEDHAUSER-RIESCH / ANR

■ Igl Parc natural Beverin â mess gl'on 2015 sut igl moto «Pros a pastiras». Egna concurenza da pros da flurs stat agl zenter. Las davosas eandas ân igls experts da la giuria visito igls pros anunzgieus. Erica Nicca e raspunsabla par igl project digls pros da flurs an la regiùn digl Parc natural Beverin. Anzemen cugls experts Peter Weidmann, c'â egn biro d'ecologeia a Cuir, a Paul Urech, igl cunzaglieader pensiuno par agricultura biologica, â ella visito durànt

sis gis igls 62 pros digls 38 manaschis c'ân s'anunzgieu. «Ca tànts s'anunzgian, vessan nus betga spitzgieu, quegl e egna beala sorpresa», gi Erica Nicca. Igl pros schen trànter 1100 a 2600 m s. m. ad en nizagieus an moda poc intensiva near extensiva.

Criteria da valitaziùn

Igls experts ân dumbro an mintga protut las sorts da plàntas sen egn toc da 2x2 meters. Tge c'êls ân cato fa surstar. Agls pros nizagieus a moda extensiva ân els pliras geadas nudo passa 55 sorts dad

earvas a flurs, tier igls pros nizagieus a moda poc intensiva ear'igl biabagn 40. «Tut tanor regiùn a posiziùn en igls pros diferaints, mo dapartut e la varietad impressiunànta», resumescha Erica Nicca.

Tanor nov criteris vignan igls pros ussa taxos. Sper la diversità da las sorts datan spezias raras – par exampel orchideas – puncts supplementars, lura igl tip da vegetaziùn, la qualitad da pavel ad oters aspects. Igl tres pros da mintga categoria cugls ple blears puncts vignan premios igls 4 d'october a caschùn da la feasta digl Parc natural a Tschupegna.




Cun talas tavlas en igls pros nudos ca sapartizpeschan da la concurenza. FOTOS B. RIEDHAUSER



Igl experts Peter Weidmann a Paul Urech ân visito tut igls 62 pros da flurs anunzgieus. Qua eni an egn pro a Closiras dafor igl Libi.

Tema da discussiùn

Concurenzas da pros a pastiras dat igl an pliras regiùns muntagnardas da la Svizra. Ellas vignan coordinadas da la Cuminanza d'interess par la cuntrada cultivada, digl Forum svizer par la biodiversità a da l'Uniùn purila svizra. La fegnamira prinzipala e da mussar quantas plàntas diferaintas ca creschan anzuma sen tals pros a quànt impurtants ca quels pros en par la biodiversità. Igl drova bleara savida, respect ad atenziùn digls purs par mantaner anavànt la varietad sen lur pros. «Jou ve udieu c'igls noss purs vegian uss antschieu a discutir anzemen igl tema digls pros cun las blearas speztgas», gi Erica Nicca. Ascheia â la concurenza gea cuntànschieu egna da sis fegnamiras prinzipalas. Viandànts san ànc salagrar igls proxims gis digls beals pros da cualm, avànt ca quels vignan sajeus.



Mintga punct stat par egn pro ca prenda part da la concurenza. Qua egna survesta da la Muntogna da Schons sura.